

國朝先正事略

國朝先正事略卷之十 名臣

平江李元度次青纂

韓文懿公事略 子孝基

公姓韓氏諱葵字元少別字慕廬長洲人康熙十一年由國子生中順天鄉試明年會試殿試皆第一禮闈撤棘

上取公卷覽之深以主司爲得人及廷對復親拔之遂授修撰纂修孝經衍義百卷充日講起居注官

聖祖召公至起居注館命作太極圖說越三日諭作四書文二首復命悉呈平日文稿又召至宏德殿講大學十四年典順天鄉試累遷侍講十八年假歸二十三年補原官二十

四年

上親試翰林公名列第二遷侍講學士未踰月擢內閣學士兼
禮部侍郎公以文學結主知凡應奉文字每進一篇輒稱善
天語稠疊嘗云韓莢天下才風度好奏對亦誠實又云韓莢學
問優長文章古雅前代所僅有也又云韓莢所爲文能道朕意
中事每侍經筵日講剪陳治理時有所獻替動天聽者多矣
而公厚重不泄未嘗有自矜之色二十六年引疾歸里居八年
以詩古文開其鄉之後進性恬曠好山水朋游暇則與二三遺
老徜徉泉石閒點勘六經二十二史自明亡科舉業日就腐爛
公出始漸復於古未遇時鄉先達頗怪之徐尙書乾學典鄉試

得公文於遺卷中。擊節歎賞。尋取上第。其文橫被六合。世以比於昌黎。而公未嘗以此自喜。及尙書與要人相構。罷歸田里。領書局。洞庭山。踰年。兩江總督傅臘塔承意興大獄。將盡鉤其黨。居門下者皆陰自貳。甚者訟言攻之。以自湔滌。公時在籍。獨昕夕造門。助其討論排纂。且爲別白。於在事者。嘗乘小舟出遊。會縣令出。隸卒爭道。覆公舟。比登岸。衣裘盡濡。戰栗移時。戒從者勿聲。竟不知爲公也。公得漁村別墅。將著書以終老矣。會有欲與公並起以爲名者。復召掌翰林院。有司敦促就道。乃行入朝。

上慰勞再三。命充一統志總裁官。時康熙三十四年也。逾年。

授禮部右侍郎。三十八年調吏部。明年充經筵講官。教習庶吉士。擢禮部尙書。仍兼掌翰林院學士事。公以院務繁。請解尙書。往得旨。卿才品優長。不必以衰病求解部務。并賜篤志經學。潤色鴻業堂額。屢與孝感熊文端公同召對。忌者謂公旦暮且入相。會江南布政使張萬祿虧庫金三十餘萬。制府阿山上言。費由南巡。非侵牟。或謂張於制府爲姻家。

上震怒。下九卿議。左都御史某訟言法當誅。公正色曰。果有違其情私。其語則公也。且斯言得上達。所益不細。忌者增益其辭以聞。

上公由是得罪。或謂公。

上每合怒詰責諸大臣。伏闕下請罪累日。卽解。公曰：吾身可危，臣節不可辱也。

聖祖嘗親試翰林。欲黜者二人。時公與法良公同掌院事。命劾奏。公謂法公曰：姑徐之。此民譽也。越日，法公入對。

上怒，命削職。隨本旗供勞辱事。眾皆趨公。公曰：法公以吾言至此，而吾乃苟免乎？又數日，召公詰責公。徐曰：此二人於院中不在，應黜之列。文雖不工，惟

上寬假之。

上霽顏爲公曲止焉。公天性與物無町畦，然持論侃侃，不爲兩可之說。其所不爲，不可以利害禍福動也。當廷試日，吳三桂

逆節已萌。公對策力言。三藩當撤。無少顧忌。其後論海關不當設關稅。不當添私鈔。禁不當過嚴。永定河事例不當許捐。道府會試所重。掄才業分南北中卷。不當復分左右。皆言人所不敢言。祭酒阿理瑚請以故大學士達海從祀孔廟。公持議以謂達海造國書一藝耳。法不當從祀。御史鄭惟孜以國子生多江浙人有冒籍赴試者。疏請盡發回原籍肄業。公曰。京師首善地。遠人嚮化方且聞風慕義來學。若因一二不肖輒更定制。恣驅除勢至太學一空。失國體事。遂寢。公待士出於至誠。士有道藝而弗伸如疾病之在己。方望溪侍郎未遇時。公實禮先焉。每聞望溪下第。必面責主司及鄉貢。相見京師。愀然曰。是非子之幸。

也。子終不遇學與行可。成公晚年病肺。飲酒不輟。望溪勸公少止。公曰。子知我者。吾少不能自晦。崎嶇官途。碌碌無所建豎。負聖主之知。今老矣。當恐未得死所。以至再辱壽考。非吾福也。且子終謂我何如。人望溪曰。公爲人。天下士盡知之。况某邪。公曰。世人多好吾文。吾文不足言。或目爲曠達。亦似矣。而非也。吾立身。尙能粗見古人之繩墨耳。吾爲亞卿。未嘗一至官正之門也。吾爲學士。未嘗一至執政之門也。自趨朝外。與馬未嘗入內城。吾好朋游。嘗與酣嬉淋漓。然貳冢宰。歲未再終。發吏之姦。爲永禁者七百餘事。鉸諸板。是誠沈飲人邪。公每與廷議歸。輒頽然自沮喪。望溪叩之曰。凡吾有言。眾若弗聞焉。將爲。

上別白之則更有陰爲掣曳者而其道必反矣內負吾心而外
藏於友朋孰若曩者家居浩然有以自得哉望溪曰

上於公意倦矣而公不告休何也公曰剛當位而應與時行也
吾後而失其時矣徒滋譴阿耳望溪曰進退有禮譴阿非所避
也是歲公果再告再奉詰責由此愈兢兢四十二年八月公以
疾薨於位年六十有八望溪嘗曰某往還公卿間其敢以古義
相繩與用余言而不疑沮悔者自公而外未之多見也公嘗與
門弟子張大受曰吾貴爲尚書何如秀水朱錫鬯以七品官歸
田飯蔬飲水多讀萬卷書嗚呼公之胸懷可謂超然物外矣湯
文正公嘗語人曰表裏洞然不可奪以非義惟韓公耳乾隆十

七年諭內閣曰。故禮部尚書韓莢。生平種學績文。湛深經術。制藝清真雅正。實開風氣之先。足爲藝林楷則。可加恩進諡。用示褒榮。乃賜諡曰文懿。第三子孝基。字祖昭。少承家學。能文章。康熙三十九年進士。選庶吉士。授編修。時文懿公負海內重望。天下士爭趨之。因樂與祖昭。昆仲遊。公薨後。奉母十餘年不出。雍正初。以原官召修明史。事竣。移疾歸。治經精三禮之學。篤孝友。事伯兄如嚴師。乾隆十六年。上南巡。召見行宮。慰問者再。時年八十有八矣。御書家學者儒四言以賜之。年九十卒。其子彥曾。進士官洗馬。慶曾。萊曾。皆舉人。

徐文敬公事略 子文穆公本 杞 孫以烜

錢塘徐文敬公先世業漁公生日江湖大上一舟爲風漂沒封翁急拯之得免僦舟者爲閩省孝廉入都應試者也翁延至家致雞黍之敬次日洗兒請孝廉命名以江湖之異名之曰潮其後孝廉累不第而文敬早達分校會試時孝廉竟出其門云公字青來康熙十二年進士由庶吉士授檢討二十三年遷贊善典試江南游陟諭德庶子少詹事通政使晉左副都御史工部侍郎三十三年充會試副考官母憂歸起補刑部侍郎三十九年授河南巡撫

聖祖諭之曰聞河南火耗重州縣虧帑者多其嚴行禁止並加

意籌畫。公抵任。潔己率屬。自布政使以下。舊時加徵於民者。皆革除之。又奏除南陽辦鉛衛輝辦漕之弊。開溝渠以資灌溉。革身行以恤商民。禁發馬以安驛遞。政俗一變。

上巡幸畿甸。諭巡撫李公光地曰。直隸與河南山東接壤。其巡撫賢否。爾必知之。李奏公居官甚優。翼日。諭廷臣曰。近日督撫李光地。張鵬翮。彭鵬。郭琇。最優。徐潮在河南。聲績亦著。四十年。偏沅巡撫金璽。奏甯遠盜犯關翰芳等四十餘名。罪皆應死。部如所議。

上特命公馳驛往讞。公奏關翰芳等二犯。應照原擬梟示。餘竝應監候。俟緝獲盜首關四。質認明確後。實諸法。旣而偏沅巡撫

趙公申喬奏關四通入狷崗。徧緝無蹤。其監候之三十五犯。請照原議處決。得旨俱免死。發遣黑龍江。先是五經博士程延祀。請給二程子祭田。格於部議。

上諭公曰。程子宋之大儒。祀典不可有缺。第祭田恐年久變鬻。其更籌久遠策。公奏請於每年春秋致祭外。別給其後嗣銀四十兩。俾展時祀。從之。是年歸德府屬災。疏請蠲賑有差。又請以常平義社各倉穀。糶借兼行。并借給貧民牛種。又言豫省秋霖傷稼。米價日昂。請改應運漕糧二十五萬石爲折色。庶民間食米不至騰貴。均得旨俞行。四十二年二月。

上南巡。公迎駕泰安。賜御書督撫箴。及懷矢清風匾額。疏

請加考城柘城溫登封四縣學額。從之。十二月。

上西巡。回鑾。公迎駕衛輝。御書楹聯及過孟津詩一幅賜之。四十三年。

上以汾河渭河皆與黃河相通。擬於河南貯米粟。遇山陝饑。卽運以賑濟。又慮經三門砥柱之險。水湍。船不能上。命公及川陝山西督撫勘議。公既與總督博霽等會疏。翼奏。又疏言豫省汴河通淮。故道有二。一自中牟經祥符。舊遷而達於淮。久淤塞。一自中牟經尉氏等縣。歷太和而達於淮。經元臣賈魯修濬。今名賈魯河。宜加挑濬。至賈魯河外。尚有支河與黃河止隔一堤。地曰花園。在鄭州之北。雖久涸而舊跡尙存。若加疏濬。通舟楫。

誠商民之大利得旨如所請行。是歲山東饑。災民多就食河
南。公令有司給糧養贍。復倡捐米粟於省會四門。按日散賑。秋
成後。資送回籍。全活者多。四十三年。遷戶部尙書。初。

上擢李公光地長吏部。諭廷臣曰。李光地。徐潮。居官優。皆得
大臣體。應早擢用。因地方起見。故久畱外任。至是。諭曰。徐潮
爲巡撫。平易得體。民無不稱頌之者。尋充經筵講官。四十四年。
上南巡。公扈從。時總河張公鵬翮劾淮安同知佟世祿冒帑誤
工。罰償工費銀七萬餘兩。并令淮揚道王謙枉斷擬杖。世祿叩
關。命公同兩江總督阿山會鞫。公覆奏。世祿無冒帑誤工情
事。不應追償。宜復職。鵬翮偏執苛刻。刪供枉斷。應奪職畱任。謙

附會欺隱。應疏職擬杖徒。從之。明年兼掌院學士。教習庶吉士。尋奉命兼理高家堰等處河工。挑河十萬四千九百丈有奇。築堤四萬一千五百丈有奇。四十六年。命齋帑監修武家壩。天然壩。蔣家壩。及挑河建閘築堤諸工。先後報竣。尋調吏部尚書。掌翰林院如故。四十九年春。乞休。命以原官致仕。五十二年春。赴京。得旨。徐潮以慶祝遠來。其與見任官一體給廩。五十四年五月。薨於里第。年六十有九。遺疏至。優詔悼恤。賜祭葬。雍正十年。詔入祀賢良祠。乾隆九年。賜諡文敬。子本。字立人。康熙五十七年進士。選庶吉士。授編修。雍正六年。督貴州學政。尋授贊善。遷侍讀。七年。遷貴州按察使。八年。調江

蘇尋遷湖北布政使。十年擢安徽巡撫。奏定緝盜章程。又條陳
推政四則。釐剔蕪湖鳳陽諸關積弊。又疏陳徵糧事宜三則。均
下部議行。壽州濱淮河積盜聚族居。假捕魚爲業。劫掠商旅。公
陸續擒治。凡漁舟皆取連環保。編甲乙號嚴查。其孫平焦鄧諸
姓久習爲匪。設族正令不時舉發疏聞。得旨嘉獎。又請增設
巡道。分巡安徽甯池太廣等屬。部議從之。遷左都御史。充經筵
講官。十二年擢工部尙書。協辦大學士。先是浙江江山奸民王
益善等謀不軌。事發株連甚眾。命本往同浙督程元章鞠治。
竄爲首者十餘人。於法全活千餘人。疏言衢屬崇山密箐。最易
藏奸。請改衢協爲總兵。以資彈壓。添設巡道一人駐衢州。其江

山之清湖鎮等處。地皆險要。請增設同知駐防。省報可。十三年。命同梁親王允禮。大學士鄂爾泰等。辦理苗疆事務。八月。

高宗御宇。調刑部尚書。協辦總理事務。乾隆元年。授東閣大學士。兼禮部尚書。總裁實錄。二年。入直南書房。賞雲騎尉世職。三年。充軍機大臣。賜紫禁城騎馬。加太子太保。七年。兼管戶部。九年春。以病乞休。

上慰留。六月。具疏力請。加太子太傅。允解任。八月。諭曰。大學士徐本。老成謹慎。宣力有年。今因疾請告。朕心眷注。特賦詩篇。以寵其行。並錫御用冠服及內府文綺貂皮等物。朕於本月二十五日。行幸南苑。當親至大學士邸。慰問之。尋。命在籍食。

俸其子侍講學士以烜給假送歸十年

上念本歸里將一載。御製五言古詩三章。賜之。詩有云。卿雖適江湖。豈不念朝廷。努力加餐飯。慰予跂望情。又云。所願眠食佳。速整歸朝駕。十二年。薨於里第。遺疏入。

上震悼。優詔賜卹。贈少傅。賞庫銀千兩治喪。命巡撫顧琮往奠。尋賜祭葬。謚文穆。二十二年。

上南巡。禮部以公未入賢良祠。不請遣祭。諭曰。朕巡幸所經。致祭名臣舊輔。乃國家念舊酬功之典。徐本。歷事三朝。宣力中外。法當致祭。胡膠柱鼓瑟。乃爾。卽命入浙省賢良祠。遣官致祭。五十一年。命入京師賢良祠。本弟杞。康熙五十一年進士。

雍正四年以編修典試廣西尋授御史轉給事中遷通政司參議太常少卿授甘肅布政使調湖南九年遷陝西巡撫召補宗人府丞三十四年卒子以烜雍正八年進士由編修五遷至詹事乾隆十八年擢內閣學士督順天學政明年遷禮部侍郎充經筵講官坐失察僱倩代考降太常卿尋署禮部侍郎以疾歸

陳清恪公事略

子文勤公世倌

從弟文簡公元龍

陳公諱詵字叔大號寶齋浙江海甯人明季陳氏衣冠日盛子弟皆治舉業務進取而公本生父之間獨承學於念臺劉公劉公殂黃先生梨洲傳師說以教浙東西而公復從梨洲游自入國朝伯叔父兄弟兄弟之子登上甲宅政府長六官出秉節鉞者林立惟公第舉乙科由康熙壬子舉人授中書三遷而副長御史開府貴州湖北人爲尙書皆特擢不由階資其給事吏科轉刑科都給事言多施用而以稽貴州土司承襲遲延指索狀劾罷大吏及請復天妃閘以奠淮黃語尤著薦紳聞其疏論河務謂黃淮自古不兩行助黃刷沙之清水亦不宜分洩黃水塞

清水不過一時之異漲稍平即可暢流。清水旁分則流弱黃水灌入。淤沙愈積愈高。邇者修歸仁堤。開胡家溝以出睢湖之水。閉六壩。培築高家堰。以出洪澤湖之水。此直借淮敵黃。一定不易之經。然淮水分入運河者多。則敵黃仍弱。舊說天妃閘離淮黃交會處二百餘丈。南至清江浦。共有五閘。重運到時。更迭啟閉。望運一過。卽下板鎖斷。官民船槳用車盤。是以淮之全力俱注於黃。其引入運河者。不過暫時資其濟運耳。自改建草壩之後。無復閘板啟閉。淮黃盡趨運河。清江浦民居可危。宜復天妃閘舊制。使淮水易以敵黃。此目前急務也。事下總河張公鵬。副酌行。尋自鴻臚卿倅大理。領臺中屢決疑獄。及巡撫貴州。民謠

於食行視山坂皆可耕。諮於介衆。僉曰：收穫不可期，入稅籍終難脫矣。遂奏免陞科。踰年，斗米錢三十，因教以蠶桑。蒔果樹，就王父成謫，成講學處，建書院，聚教羣士。延及苗童，黔民久而慕思之。移鎮湖北，值武漢所屬十五州縣，衛夏秋歉收，請分別蠲緩賑濟得旨允行。尋晉工部尙書，轉禮部尙書。官中事無不釐飭當。

聖祖中年直省大吏員缺，必咨臺垣九卿舉者多，陰奉要人，憎或自援親故而公所舉惟三人：高安朱文端、公始令潛江，以讞疑獄，公記其名。前後凡四薦沈端恪，公未遇時，給資誘進，既通籍，揚於朝，准黃洪澐舉陳恪勤，公爲河督，世以公爲知人。公性

沈靜其治事。句稽文簿。終日不倦。事畢卽閉閣下簾。手一編。未嘗一日去書。謂四子書。諸經之膏液也。近體諸身。然後知須臾不可離。作四書述。嘗慨酷吏深文擊斷曰。律者聖人以不忍人之心著之。爲精義之學者也。作讀律述。謂孔子學易。期於寡過。人事萬變。包於六位。隨時隨事。必有合焉。作玩辭述。手批通鑑及綱目。丹黃凡五周。論多獨見。作通鑑述。晚年將次第排纂。未卒業。康熙五十八年。具疏乞休。得旨。卿才品優長。服官日久。兩授巡撫。潔己愛民。茲簡任秩宗。正資倚任。覽奏以老疾乞休。情詞懇切。可原。官致仕。六十一年冬卒。年八十有一。諭賜祭葬。諡清恪子六。長世雋。丙戌進士。江西建昌守。次世儼。辛卯舉

人。次世仁。乙未進士官檢討。次世倌。官至大學士。次世侃。癸巳進士官檢討。

世倌字秉之。號蓮宇。登康熙四十二年進士。選庶吉士。授編修。五十年充山東副考官。累遷中允。侍讀。五十二年典廣東鄉試。充日講起居注官。五十八年充順天鄉試副考官。明年提督順天學政。遷侍讀學士。雍正二年父服除。擢內閣學士。授山東巡撫。會境內多蝗。入境後密訪被蝗各屬。損稼重輕。且察羣吏能否。具得其大略。而後視事。尋疏言社倉通有無。濟豐歉。古今皆可行。請令每鄉立印簿。捐者自注籍穀數。不拘多寡。舉公正鄉約三人。輪管出入冊報。官查。春夏之交。許民間借領。至秋每石

收息二斗。歛則減之。十年後息倍於本。祇收二斗。第小民可與落成。難與慮始。各督撫宜於一省中先行數州縣。俟著有成效。然後廣行。下部議如所請。又奏通省下銀。請攤入地畝徵收。又遵旨會議海防事宜五則。皆從之。四年。母憂歸。命督修江南水利。坐遲誤落職。仍命赴曲阜督修文廟。十三年。起副都御史。乾隆元年。陳臺灣事宜三則。下所司議行。未幾。授倉場侍郎。調戶部左侍郎。遷左都御史。疏請定各部院會議遲延處分五年。轉工部尚書。六年。授文淵閣大學士。教習庶吉士。奉命往視淮黃河工。乘傳周覽。每疏論河務。皆本確見。九年春。予假回籍。請開缺不許。尋疏言山東劇盜田豬頭等及沛縣巨

竊姚乾等見均就獲。因各省均有劫案。關訊待質。臣以爲此等
大盜。但數案審實。卽應正法。毋久稽顯戮。

上韙其言。十月還朝。明年加太子太保。命紫禁城騎馬。十三
年冬。坐票擬錯誤罷歸。十五年入京。恭祝

萬壽。賞原銜回籍。十六年三月。特召入閣視事。兼管禮部。

十七年典會試。十九年再典會試。二十二年請老。得旨允其

回籍。如一二年後精神清健。仍可來京辦事。以副優眷。耆臣至

意尋命加太子太保。明年春。陞辭。御製詩賜之。賚白金

五千兩。命在籍食俸。四月薨於京邸。公少承家學。嘗言。自始

仕至服大僚。戰戰慄慄。惟懼或蹈於非義。以負先人之志事。當

官守道。棘棘不阿。方侍郎也。嘗謂公長臺垣。其規模氣象與念臺劉公爲近。乃歎清恪公之教行於家。而劉公之風能使異世下聞而興起也。公卒年七十有八。

上聞軫悼。再賞白金千兩治喪。派散秩大臣帶領侍衛十人往奠醑。賜祭葬。予諡文勤。

元龍字廣陵。號乾齋。清恪公從弟也。康熙二十四年一甲二名進士。授編修。入直南書房。明年充日講起居注官。夏四月。侍班乾清宮西閣。

聖祖顧謂曰。朕素知爾工楷法。其作大書一幅。命就御前作書。

上嘉獎以御書闕里碑。父示之。二十八年爲都御史郭琇劾罷。逾年詔復任。三十三年遷侍讀。御書鳳池良彥額。立御書一卷。賜之。三十五年隨。

上親征噶爾丹。遷庶子。三十八年典試陝西。又明年遷侍讀學士。

上御便殿作書。賜內直翰林觀。諭曰。爾等各有堂名。可自陳。當書以賜。公奏臣父之闔年逾八十。擬愛日堂三字。御書賜之。四十二年擢詹事。充經筵講官。四十三年請終養。許之。賜公父人蔭參斤。命攜歷代賦彙歸。校對增益。明年。

上南巡。公迎駕。慰問備至。兼詢其父起居狀。賜御書南陔。

日永額。賜公父人蔭金扇諸珍。又賜公母陸氏慈教貽休
額。諭以家有老親。毋遠送。尋丁父憂。四十九年。擢掌院學士。
教習庶吉士。明年。授禮部侍郎。出爲廣西巡撫。首疏陳三事。一。
桂林貯穀。高建倉廩百餘間。以避潮溼。一。興定陡河水通灘江。
達廣東。爲三楚兩粵運糧要道。舊閘傾圯。率屬捐俸修築。一。養
濟院外。別構屋數十間。收養鰥寡。又立義學。以貧士爲師。量給
修膳。創育嬰堂。設粥廠。施藥餌。以賑窮民。報聞。泣粵七年。盡心
撫字。吏畏民懷。所建陡河石隄。及三十六陡門。盡復漢馬援唐
李渤故蹟。五十七年。擢工部尙書。六十年。調禮部。疏言。選拔久
停。請康熙三十六年例。命學臣如數拔取。送監肄業。從之。

世宗御極 命奉守

景陵仍食禮部尙書俸。結茅馬蘭峪者六載。雍正七年。詔尙書陳元龍。左都御史尹秦。均係

聖祖舊臣。雖年近八旬。精力尙健。其各授額外大學士。以示優眷。尋晉文淵閣大學士。兼禮部尙書。先是公撫粵時。奏請捐穀折銀交納。分得羨金十一萬七千有奇。內捐出公費銀九萬三千。及捐攸軍需銀十萬。均經奏明。嗣因倉穀有虧。部議仍追償銀二十一萬有奇。不準扣抵。限五年交納。至是。特旨許照數扣除。尋疏言。各省題奏。請增揭帖一通。送起居注館。記注後。送內閣。從之。又疏言。各番役多與流棍串通。所獲賭博。關毆等犯。

往往匿犯索財。卽行私釋。其窮苦者始行送官。請嚴定送官期限。違者訊治。詐贓賣放罪。下部議行。十一年。優詔許原官致仕。加太子太傅。令公子編修邦直隨歸侍養。啟程日。賞御膳。著六部滿漢堂官餞送。沿途官弁迎送如禮。乾隆元年。詔在籍食俸。八月薨。諭賜祭葬。謚文簡。著有愛日堂文集。海甯陳氏自素庵相國之遴後。與爰立者得文簡。文勤而三官正卿及卿貳者復四。三人大司空。文和公敬永。少司寇。論少宗伯邦彥。其最著也。其他侍從甲科。不可勝數。蓋一時之盛云。

王文恭公事略 第九齡 鴻緒

國初漢大臣兄弟並起家詞館。齊政府長七卿。及爲卿貳者。若
崑山徐氏海甯。陳氏華亭王氏。其最著者也。王氏昆仲三。而文
恭公居長。公諱頊齡。字頤士。號瑁湖。父廣心。字農山。順治六年
進士官御史。以文名。巡視京通二倉時。釐剔漕弊。疏凡三十餘
上。清操凜然。猾吏莫敢犯。公由康熙十五年進士。授太常博士。
十八年。詔舉博學鴻儒。郝尙書惟訥薦公。詩詞風雅。品誼端
方。召試一等。授編修。纂修明史。二十年充日講起居注官。二
十一年上元節。

上御乾清宮。賜大學士等宴。做柏梁體賦詩。公與焉。尋遷贊

善侍講典福建鄉試提督四川學政母憂歸起補侍讀遷侍講學士會都御史郭琇疏劾少詹事高士奇與公弟左都御史鴻緒植黨營私請令公及士奇鴻緒並休致十月詔公畱原任三十年轉侍讀學士三十六年遷少詹事再充日講官知起居注歷宗人府丞晉禮部侍郎四十三年

聖駕南巡幸公第秀甲園賜御書蒸霞額四十六年

上南巡閱河復幸秀甲園先是公弟鴻緒官侍郎時乞假省親蒙賜白金文綺亦葺園爲奉親之所額曰賜金園至是並邀宸顧海內榮之五十一年公調吏部左侍郎充經筵講官明年擢工部尙書八月充恩科會試正考官五十四年二月

復典會試五十七年。拜武英殿大學士。松江濱海。日兩潮。歷久不易。是歲重九日。公拜入閣之。命潮忽三至。人咸異之。雍正元年癸卯。詔開鄉會。恩科。公以重與鹿鳴宴。加太子太傅。尋乞致仕。得旨。卿品行端凝。學問淵博。典章政事。經歷最多。且係

先帝舊臣。正資襄贊。可照舊供職。二年再疏乞休。

上復慰留。並諭內閣曰。

皇考簡用之人。如因衰老。休致。朕心不忍。王項齡年邁。閒時行走可也。賜詩有跡。與松喬合心緣。敢沃留之句。因自號松喬老人。三年秋。公疾。命御醫診視。賜養餌。八月薨。年八十有

四。優詔悼惜。且曰王項齡去歲以老乞休。朕念

皇考時大臣無幾。每見伊等心甚愴然。不忍遽允所請。降旨慰
留。待三年後始行予告。不意遽溘逝。豈朕體恤舊臣之意有未
誠邪。可特贈太傅。予優卹。加祭二次。較朝一日。朝臣出其門下
者。均令素服持喪。各部院漢官俱前往祭送。以副朕惓惓老成
至意。尋賜祭葬。諡文恭公。初以文學進。洊歷卿曹。諳練典故。
在政府八載。恪誠純一。以風度稱。所著有世恩堂諸集。弟九齡
字子武。恬靜有雅量。康熙二十一年進士。由庶吉士授編修。累
遷通政司參議。侍講學士。充日講起居注官。洊陟少詹事。兼都
御史。三十九年充會試副考官。擢內閣學士。尋擢禮部右侍郎。

時兄項齡亦貳禮部公疏請迴避調兵部尋調吏部晉左都御史四十八年十二月卒於官。賜祭葬如例。著有艾納山房集。鴻緒字季友號橫雲康熙十二年一甲二名進士。賜及第授編修十四年充順天鄉試副考官尋充日講官知起居注累遷贊善侍講十九年。

聖祖諭獎諸講官奉職勤勞加公侍讀學士銜時廣東有朱方旦者自號二眉山人以左道惑眾造中說補聚徒橫議常至數千人又自詡前知與人決休咎會順承郡王勒爾錦討吳逆駐師荊州方旦以占驗出入軍營巡撫張朝珍亦稱之公具疏列其誣罔君上悖逆聖道搖惑人心三大罪方旦伏誅二十一年

轉侍讀。充明史總裁。再擢內閣學士。戶部侍郎。二十四年。典會試。明年。請回籍治本生母喪。得旨。賜祭。又明年。擢左都御史。疏劾廣東巡撫李士楨昏憤貪劣。於曾從吳逆之知府林杭學。保舉清廉。士楨坐罷。杭學奪官。公尋以憂歸。二十八年。服闋。將赴補。而郭琇之劾疏上矣。疏稱鴻緒兄弟。與詹事高士奇招權納賄。并及科臣何楷。編修陳元龍。得旨。均休致。未幾。江甯巡撫鄭端再疏劾之。

聖祖特諭曰。朕崇尚德教。蠲滌煩苛。凡大小臣工。咸思恩禮。下逮曲全。始終卽因事放歸。仍令各安田里。近見諸臣黨同伐異。私怨相尋。牽連報復。雖業已解職投閒。仍復吹求不已。株連逮

於子弟顛覆及於身家。朕總攬幾務已三十年。此等情態知之甚悉。夫媚嫉傾軋之害。歷代皆有。而明季爲甚。公家之事。置若罔聞。而分樹黨援。飛誣排陷。迄無虛日。朕於此等背公誤國之人。深切痛恨。自今以往。內外大小諸臣。宜各端心術。盡蠲私忿。共矢公忠。如或不悛。朕將窮極根株。悉坐以朋黨之罪。時公方就質。詔至得釋。三十三年。大學士王公熙。張公玉書。合疏薦公與徐尙書高詹事。文學優裕。並召來京修書。三十八年。授工部尙書。充經筵講官。四十七年。調戶部尙書。明年。坐附會內大臣阿靈阿等議奏改立皇太子事。奉諭切責。以原品休致。五十三年。疏進所修明史列傳稿二百八卷。請宣付史館備

參考得旨下明史館察收始公任館職時奉命總裁明史與湯潛庵徐健庵葉訥庵諸公互相參訂僅成數卷及奉召重領史局諸公罕有存者惟張文貞王書爲監修陳文貞廷敬爲總裁各專一類張公任志陳公任本紀公任列傳而公以原銜食俸較二公多暇日數年閒彙分成帙會熊文端賜履續奉監修之命檄取其傳稿以進公與張陳兩文貞皆未參閱恐尙多舛誤及歸田後重理舊編復經五載始克搜殘補闕以成此書也五十四年復召來京修書充詩經傳說彙纂及省方盛典總裁官雍正元年八月薨於京師所著曰橫雲山人集

劉喬南中丞事略

康熙四十五年夏江甯太守陳公鵬年被劾士民鳴鉦擊鼓撞
塘踞呼叩制府鳴不平者日數萬人於時江西父老拏舟東下
爲贛南道劉公蔭樞訟冤亦數千人遠近爭傳爲民所依而獲
吳上官者同時而得二公劉公字相斗別字喬南陝西韓城人
晚自號秉燭子性樸直無游移康熙十五年進士知蘭陽縣地
濱河舊設巡河夫爲民困公減其半行取爲給事中母服闋補
原官前後章數十上論連捐速陞之弊陳豫秦兩省事宜又言
潘臬兩司宜入覲奏事又請試捐員停保舉開言路數名實皆
報可每會議反覆爭執數梗要人所欲保薦者外轉贛南道徧

示屬吏曰。子欲爲忠臣乎。夫愛民卽忠也。郡守與鎮將比重門。稅以朘民。公詰之。陽奉而陰違。乃置酒邀守與將。甫就坐。僕白奉命市麥布門者索稅。畱質在門。守將語塞。乃盡革其稅。公復具觴邀鎮將。揖之升堂。疾下拜曰。帥惠吾民。敢不拜。嘉市故有米稅。牙人主之。濫額數十倍。公得其記簿。別委人收之。籍盈餘。官買田以抵牙稅。勒石永禁。署按察使。有重獄。督撫各持所見。公柴立其中央。遂以失出罷官。會關中饑。盜且起。公歸貸粟賑荒。爲築堡以守。黃河自縣東北南行。出龍門山中。兩岸皆絕壁。公治鐵爲柱。索俾舟皆緣之以行。無漂溺患。修石路二十餘里。造南郭石橋。修柿谷陂。鄉里賴之。四十二年。

聖祖西巡公迎 駕潼關

上遙望卽曰此劉髯也何爲民服公以被劾對 詔復官公廣
類美髯官科垣疊 召對

上故識之起雲南按察使濬昆明湖築六河岸牘各屬府州縣
例用親信人坐省與院司家僕胥吏交通公首革之有造蜚語
謀叛者戮其渠散其黨姦豪屏跡訟獄以稀就遷布政使除科
場雜派賑凶饑所措注皆順民心四十七年擢貴州巡撫其地
苗狎雜處民多僑寓自前明安播始禍 國初水西大閼號難
治公至絕餽遺省徭役軍民大和黔多山少田鄰省歲協餉二
十餘萬稍愆期營伍號呶公請豫撥二十萬貯藩庫格於部議

者三尋密奏。特旨允行。會紅苗猖獗。兵餉夙備。眾乃服公深識。凡山田一年耕。率不可再。民懼歲征之莫敢田。公榜示聽民墾荒不起科。四川遵義民苦加派。赴愬於公。公密疏以聞。或疑之。公慨然曰。蜀民獨非朝廷赤子邪。詔遣使臣會川撫察勘。黜守令數十人。一時鄰省有司貪橫者多恐懼。易行中人自修飭。監司大府轉相告戒。檢察所屬道路咸載其言。撫黔五年以老請休。溫旨慰留。會蜀之烏蒙土司與黔之威甯土舍相仇殺。蜀撫年羹堯使吏勘問。二酋負固不出。疏請以兵臨之。公持不可。詔遣都統侍郎三人出會蜀滇黔督撫提鎮於畢節。按其事。苗民大懼。公肩輿從數卒行山中。諭若曹各安堵。無恐先。

至畢節獨棲荒寺中諸公繼至則爲謝曰邑小供給薄勿嗤也
若令下不嚴老夫非畏人者則又曰此小吏可了事耳命千總
一人往招威甯聽命而烏蒙不至公使諭之曰若出吾活汝抗
命必滅汝老夫無多言亦不食言烏蒙素服公恩信亦自縛出
服罪解仇二酋私相語曰劉公眞天人也明年澤旺阿喇滿坦
掠哈密公疏言小醜無用大師但宜慎擇人核名實安內地重
圖本有旨命公乘傳赴軍前周閱詳議公卽日就道抵巴里
坤行視軍營上書數千言請屯兵哈密毋輕出以逸待勞已又
以病乞休詔責其憚遠涉公疏謝復乞骸骨命還黔撫任
士民攀援如見慈父母後數月休致入京下刑部議以阻撓軍

務罪死。詔發博爾丹種地。時年八十有二矣。子熾請待行公笑止之曰。死於道路。與家庭何異。爾歸耕田讀書。吾身君之身也。無我慮。居三年。

上諭廷臣曰。劉蔭樞能直諫忠臣也。但書生不知兵耳。詔復職還京師。六十一年春。與千叟宴。公首坐。

世宗御極。召見。愀然曰。卿。

先帝大臣。朕欲大用。然爾年力實不能勝矣。公遂薦孫勣王沛。檀陳時夏王璋四人。賜御硯朝珠白金。令還鄉。雍正元年九月卒。年八十有七。公耄期好學不倦。在滇黔各五年。以教養斯民爲己任。重儒官。廣中額建書院義學。朔望躬進羣士。誘迪之。

軒車所稅。見農夫孺子。必諄諄勉。以爲善。去惡。雖苗獮亦然。自
塞外歸。鬢髮之白者多。變而黑。生兒齒二。蓋實能以義理養心。
而不奪於外物也。著春秋蓄疑四卷。易經解二卷。宜夏軒雜著
二卷。藏於家。始公與陳公並以罷官名聞天下。厥後陳公游陟
河督。而公以衰老不復用。海內惜之。然滄洲任司道未久。不及
有所設施。及督南河。遂以死。勤事轉不若公於壯盛久任監司。
大府。義事仁心得實播於民物也。劾二公者爲制府阿山阿公。
本以廉幹著稱。其始至也。使親信人訪察江西官吏所至爭承
迎。惟公若弗聞也者。毀譖日積。故因事以斥之。其惡陳公則以
不從其令故及聞二公爲民所戴。實深悔焉。用此見臺吏操威

枋者當知左右親信所非毀及凡於已有拒違者賢人君子多出於其閒卽是可爲聽言觀人之準則也

張清恪公事略 子慈敬公師載

儀封張清恪公伯行字孝先晚號敬庵父岩邑諸生明季奉母避亂兄爲寇掠被箠幾斃負而逃出族有嫠婦馬氏郭氏王氏悉爲立後歲祿煮粥以賑全活甚眾祀鄉賢公舉康熙二十四年進士歸築精舍南郊縱觀諸子百家及讀小學近思錄乃恍然曰入聖門庭在是矣讀書七年補內閣中書父憂歸啜粥三年不入內室服闋建請見書院與鄉人士講明正學二十八年夏大水公率居民築堤保境河督張公鵬翮異之疏請檄公贊理三辭不許以原銜赴河工督修黃河南岸堤二百餘里及馬家港東壩高家堰石工四十二年授山東濟甯道值歲荒傾家

財運穀以賑。載錢及綿衣數艘分給凍餒者。尋奉命賑汝上陽穀饑。動倉穀二萬二千有奇。藩司責其專擅。將申劾。巡撫直之。得免。四十四年。

聖祖南巡閱河。御書布澤安流四字以賜。并詩章二。詩扇二。明年。

上遣近臣封開催漕。諫曰。濟甯道張伯行諳曉河務。可與商。推公相。高下引運。河水北注。蓄洩得宜。事竣著書紀其事。卽世。所行居濟一得也。夏。遷江甯按察使。吏白。故事。送督撫贄。約金四千。公曰。我誓不取民一錢焉。辦此揚州諸生六人。忤郡守。巡撫欲盡褫之。公曰。以窮諸生冠服迎合上官。吾不爲也。力雪之。

四十六年。

聖祖南巡。命督撫舉賢能。公隨督撫入對。

聖祖曰。朕向原認識爾。到江南。卽知爾爲清官。復顧督撫臣曰。張伯行居官何如。皆曰。好。大學士張公玉書對亦如之。

聖祖曰。江南更有如此好官否。皆曰。無。

聖祖曰。然則爾等何以不保舉。今朕自保之。他日居官好。天下以朕爲明。主否則笑。朕不知人。又曰。張伯行篤實。卽置之行間。亦非退縮者。遂擢福建巡撫。隨駕至西湖。御書廉惠宣猷四字以賜。涖閩。值旱荒。發帑賑歲。遣官買米。平糶禁米船入海。絕盜糧。擒巨盜。陳首魁吳海等。疏請增鄉試中額十名。從之。建

鰲峯書院。祀宋五先生。集諸生院中。日纂錄古人嘉言善行。依小學諸綱目。條貫成書。手定爲八十六卷。曰小學衍義。以教諸生。設藏書樓。購經籍四百六十餘種。毀淫祠。贖女尼爲民婦。先是臺灣兵屢鼓噪。公謂倡亂之人。平日必多不法。以他事除之。煽誘自絕。鎮臣如公。教後無譁者。公治尙嚴明。貪吏好胥。輒盡寘之法。政教大行。其禁止餽送檄有云。一銖一黍。民脂民膏。寬一分。民受一分之賜。受一文。身受一文之汙。時傳誦之。

聖祖將令移撫江南。大學士李公光地請畱閩。張公玉書奏江南比歲災。民不聊生。非此人往不可。

上笑曰。汝兩人不必爭。朕當慎簡一人。以畀汝閩。遂移撫江蘇。

而以陳公瓚代之。士民攀號如失。怙恃公疏請緩帶徵澤。賑徐州府及海高等十四州縣災。並蠲瓜洲浮稅。舉劾屬僚。無所阿徇。豪猾皆望風遠遁。時總督噶禮張威福甫蒞任。劾免撫藩蘇州知府陳鵬年。糧道臧大受。廉直有聲。皆劾去之。公遇事持正。鬱鬱不自得以病乞休。有詔張伯行操守清潔。立志不移。朕所深悉。江蘇重地。不得以衰病辭。五十年江南鄉試副考官趙晉與總督交通關節。榜出譁然。士子昇財神入文廟。正考官左必蕃不自安。疏聞。公亦據實奏。

上命尚書張鵬翮侍郎赫壽出按其事。公與總督暨安徽巡撫均會鞠時舉人程光奎吳泌已具服。藩司吏李啟供與家僕斬

三營弊。軒三者總督閩人也。於是總督持其事。且索銀五十萬。保無事。張尙書因其子懋誠任懷甯令。恐遭陷害。亦瞻顧掣肘。獄莫能定。明年春。公劾督臣抗旨欺君。營私壞法。請正國典。以彰公論。總督亦飛章許。公不肯出洋。捕賊及誣陷牙行。張元隆諸款。

上命俱解任。付使者雜治。尋奏晉與光奎泌賄通關節。擬罪如律。鳴禮劾伯行不能清理案件。屬實。餘係苛劾。應降詔。伯行劾鳴禮索金事。全虛。應奪職。贖徒。

上切責張鵬翮。赫壽掩飾和解。命尙書穆和倫張廷樞覆訊。訊如前。鳴禮免議。公仍奪職。部議亦如之。

上以公爲天下清官第一責諸臣變亂是非且曰朕自幼讀書
研窮性理如此清官不爲保全則讀書數十年何益而凡爲清
官者何所賴以自安乃命九卿翰詹科道再議議上

聖祖復諭曰爾等身爲大臣既知張伯行清廉當會議時何無
一言及朕有旨始同聲贊其清亦已晚矣宜體朕保全廉吏之
意使正人無所畏忌庶海宇長享昇平之福遂命復公任而黜
噶禮尋帑戮焉方公之解職也百姓罷市哭聲殷場城且議相
率叩闕公慰諭再三環泣不肯退蘇州等郡相繼報罷市士
民扶老攜幼具菓蔬來獻公辭皆泣曰公在任止飲吳江一杯
水今將去子民一片心不可卻也乃取腐一塊菜一束眾仍委

地去獄具回蘇揚人慮途中不測將集江干護行眾數萬公聞之五鼓登舟比曉已渡江抵蘇寓楓橋士民獻果蔬如在揚時七月復赴揚聽勘回蘇時比戶焚香遮道不可行及復任士民歡忭拜龍亭呼萬歲者至數十萬人復相率詣闕跪香進疏願各減年壽一歲祝添

聖壽萬年

上聞大悅而全閩士民始奔號呼顙既而頌恩祝聖亦與江蘇不約同自是公直聲浩氣震天下五十二年進濂洛關關集解疏薦福建布政使李發甲臺灣道陳瓊前祭酒余正健旋奏免揚州落地稅且曰臣衙門舊有鹽課陋規二萬兩臣在任

五年絲毫弗取。眾商願每歲捐銀千二百兩。抵解稅銀。得旨。俞允。明年疏請嚴海禁。尋劾布政使牟欽元。藏匿通洋匪棍張令濤。請旨革職著追。張令濤者。噶禮前劾公拖獎之船埠張元隆。卽其弟也。時部檄搆輯海寇鄭盡心。餘黨崇明鎮弁詰一船人。照不符。得元隆爲之關通。領照狀。又上海民顧協一。訴令濤佔踞房屋。謂其舊爲噶禮幕客。今匿牟欽元署中。有水寨數處。窩藏海賊。公捕治。令濤因劾欽元。得旨革職。下總督赫壽察審。赫壽奏協一所控無左驗。欽元署中亦無令濤。

上復命尚書張鵬翮。副都御史阿錫鵬。赴鎮江審勘。遂劾公狂妄自矜。請解官嚴訊。疏六上。

上不得已允之。時公因事赴常州。卽舟中解綬去。伴送鎮江。夜分對簿。多方摧折。并脅幕下客代承鵬翮等奏。元龍令濤皆良民。伯行誣劾。

上責其不能盡心研審。令再詳訊。遂命公回奏。公疏言。張令濤在藩幕。乃其子張二所供也。牟欽元匿使不出耳。未幾竟坐公挾詐欺公。誣陷良民。議斬公處之。恬然讀書。晝夜無閒。爲門人講說成講義數十篇。居半歲。體加充色。加辟獄上。

聖祖不從。命公免罪。入都。過揚州。父老數萬焚香夾兩岸。行求停舟一見。爲監行胡同知所格。抵京。公請。陛見。使臣不可以付吏。

上命使臣同公陞見。且曰：張伯行原無罪，當以錢糧事任之。明日召對，命講太極圖說，入直南書房，權倉場總督，奏除積弊五十五年。奉命往賑順天永平二府，講行社倉法。明年，典順天鄉試，時方督糧通州，特召入闈，異數也。旋授戶部侍郎，兼督倉場。六十年，總裁會試，所得士來謁，必告以聖賢之學，務實心報國，不可汨沒勢利，負科名會河決。召對行在，論河務，以母病歸省。命便道視武陟決口。明年春，與千叟宴，偕諸臣入謝，皆賜坐。諭曰：汝等皆大臣，當惠愛百姓，如張伯行爲巡撫時，是真能以百姓爲心者也。十一月。

世宗卽位，眷公舊臣，逾常格。命與議政，賜紫禁城騎馬，遷

禮部尙書 御書禮樂名臣額賜之

上親郊前三日視牲故事皆王公大學士行禮

上特以命公雍正二年進續近思錄張南軒陳克齋陳北溪許

魯齋諸集命赴闕里致祭追王先聖五代便道歸省親建

議以明儒羅欽順本朝陸隴其從祀兩廡又請以宋儒張子之

父張迪配享崇聖祠從之三年二月薨於位年七十有五遺疏

請崇正學勵直臣爲千古第一首出之君綿萬世無疆之祚

天子悼之贈太子太保子祭葬於卹典外加祭一次遣大

臣奠醊命部寺漢堂官及科道於諭祭日齊集出殯日會

送賜諡清恪公歷官二十餘年未嘗攜眷屬初任濟甯隨行

止四人撫閭十二人。撫吳十三人。日用蔬菜米麥尺帛寸絲。以至磨牛碾石。皆自河南運載之。官初涖閩。官廨帷幕皆錦繡。驚問吏以行戶鋪設對。盡撤還之。比移吳。先檄所屬禁陳設。無錫令送惠山泉。受之後。聞亦派民舟載送。卽卻不受。治民以養爲先。以教爲本。遇災禋則請蠲。請賑廣設常平義社倉。所至必修建書院學舍。閩士肖公象祀於鼇峯。吳人建春風亭於公祠。與于清端湯文正兩祠並峙。在濟甯時疏濬濰河。兗州十五縣無水患。又捐貲築五岔口堰。引水入濰。士民蒙利。立生祠五岔口。公按察江蘇時。始至未受篆。卽過方望溪先生辭。不獲公入。曰。吾迫欲一見論學耳。望溪曰。某未知學。但聞守官之大戒。二其

一義利也。公既觸然不滓矣。進乎此。則利害非知命而不惑者。不能無搖。公題之。及撫江蘇。首劾噶禮。望溪適以南山集牽連。赴詔獄。噶禮遂劾公。久閉方苞於官舍。不知所著。何書。人皆爲公危而。

聖祖之宥苞實自此始。公天性樸誠。凡所設施皆本於實踐。而尤以力崇程朱爲己任。及門受學者幾千人。輯遵學源流道統錄。以明聖賢之宗傳。輯伊洛淵源錄。續錄。以明諸儒之統緒。輯小學衍義。小學集解。養正類編。訓蒙詩選。以端蒙養之教。輯學規類編。學規衍義。程氏家塾分年日程原本。近思錄集解。續近思錄。廣近思錄。性理正宗。諸儒講義。以垂正學之型。輯家規類。

編閨中寶鑑以示修齊之範。輯濂洛關閩集解以配學庸語孟。名曰後四書。謂許薛胡羅爲周程朱張之正傳。其文集及讀書錄居業錄困知記皆選刻行之。謂陸稼書學朱子爲許薛胡羅之繼。起就其家搜訪遺書得問學錄讀朱隨筆讀禮志疑爲鏤板以傳。謂楊龜山謝上蔡尹和靖羅豫章李延平衍程子之派者也。張南軒呂東萊取資於朱子者也。黃勉齋陳北溪陳克齋受學於朱子。眞西山熊勿軒吳朝宗私淑於朱子者也。有明之學得其正而不爲邪說搖者曹月川陳剩夫崔後渠汪仁峯蔡汝濱也。本朝之學宗朱子者張楊園陸桴亭汪猷菴陳確菴魏環溪耿逸菴熊愚齋吳徵仲施成齋諸莊甫應潛齋劉仁寶

也。凡諸儒述作。莫不精擇而校刊之。而朝宗。徽仲。成齋。莊甫。皆
隱居力學。世莫能知。公特爲表章。尤見闡幽之義。云公不從陸
王之學。然未嘗著書闢之。惟校刻程啟陂之閑闢錄。陳清潤之
學部通辨。張武承之王學質疑。以示學者。又重刻諸葛忠武。陸
宣公。韓魏公。范文正。司馬溫公。及文文山。謝疊山。方正學。海剛
峯。楊椒山。楊大洪。諸文集。其三朝名臣言行錄。四書正宗。學易
編。五經大全。則皆未成之書也。所自著者。曰困學錄。續錄。正誼
堂文集。

仲子師載。字又渠。號愚齋。康熙丁酉舉人。以任子爲戶部郎。
世宗指示閣臣曰。此張伯行子。好司官。由揚州知府。累遷江蘇。

按察使內擢左通政倉場侍郎。命閱視天津河道。旋以侍郎出副江南河督。乾隆十六年。

高宗南巡。每召見。輒詢及隨父任時事。益隆授江安巡撫。仍協理南河事。明年河溢二閘。徐州被衝。公與高文定公並奪職。在工贖罪。又二年放歸。起兵部侍郎。五月遷尙書總督漕務。明年調河東總督。時山東孫工決口。賈船漕艘如泛大海中。公冒風雪宿河岸。燈熒熒達曙。自冬歷春築始完。公嘗言河中土性水勢與江南異。兩岸相距寬宜多挑引河以殺險。土多浮沙宜厚培客土以實虛。自此由濟甯治所抵開封歲往來如織而心力亦交瘁矣。二十九年薨於位。年六十有九。贈太子太保。

謚慈敬。公幼承家學。精研宋五子書。以報國活民爲心。及登仕籍。愈感奮懼。有玷缺爲名父羞。在揚州歲饑。散賑而高郵湖西之民。緣被災分數較輕。不得與。公行部至其地。見道旁人多骨立待盡。大驚。召長吏詰責。隨請於上官。不待報而廩之全活數千人。入江都。芒稻閘爲淮黃高寶諸河入江之關鍵。所司貪商人餌。惟知蓄水爲逆鹽地。藉口必奉鹺使令。乃開會夏潦暴漲。低田盡湮。公訪知運鹽需水止六七尺。而既過其半。遂單騎往啟閘。纔啟四板。水暢出甚疾。仍艤舟宿其旁。明旦田皆涸出。然後走白鹺使。使者大恚責公。專公遜謝曰。知府信有罪矣。第拯溺不淹刻。必預請而後行。如此萬家煙火。何卒具牒大府請開。

歸府轄如公議河庫道司筦鑄不任功過向爲美官公以才爲前後督臣所倚輒委辦險要大工以故於河務浸熟悉一生敷歷中外遂與河務相終始焉初河督稽文敏公母卒奉在任守制之命特具劄固請終喪眾以違旨獲罪爲疑公慨然進曰公父忠母節門望非常患請之不力耳何慮觸禍爲文敏謝曰謹受教其在江西嚴無故遷葬之禁行連坐法薄俗遂革撫江安二年多偏災皆據實請蠲賑全活甚眾痛懲匿名訐告習以靖地方凡此皆清格公之教也著有治水方畧改過齋文集讀書日鈔等書

田文端公事略

公諱從典字克五號嶢山山西陽城人父雨時邑諸生遽於易以理學顯設教天井關學者立碑頌德卒祀鄉賢祠明季寇亂邑人欲迎賊紆禍力斥之闔城人無汚賊者既賊至挈幼子及兄遠孤避地度不能兼顧乃棄子負兄子以走賊退求子於草間得之卽公也初公生母白夫人將育公贈公卜得丙戌日吉稿於神果以是日誕五歲能誦三經十歲能文章與故浙江巡撫張公泰交同補弟子員張亦有文名時稱田張康熙甲子舉鄉試第二戊辰成進士是科多名下士長洲何焯號知文推公尤第一云釋褐後七年授英德知縣以廉惠誓於神英德地瘠

苦賦籍不可稽。奸民詭寄逋逃。儒者益困。公盡革陋例。清其籍。民困大蘇。修眉山書院。立宋賢唐介鄭俠洪浩祠。以風示學者。邑士近百年鮮得解者。至是比歲舉於鄉。凡八九人。政成。行取入都。縣民攀戀。追送有踰嶺者。四十三年。授御史。疏陳調繁之弊。謂督撫請調州縣有秉公調者。卽有徇私以調者。在州縣求調之弊有三。曰希圖善地。曰規避衝地。曰預爲卓薦。地在督撫濫調之弊亦有三。曰曲徇請託。曰引用腹心。曰公行賄賂。皆借整飭地方爲名。巧投捷徑。侵帑剝民。屢經敗露。除江浙等省賦重難征之百有餘縣。及邊遠煙瘴地。請仍舊例調補外。其餘縣不許調並嚴定督撫濫調之罰。又請勅吏部嗣遇考選科道。

凡正途出身之部屬及由知縣擢任之中行評博與翰林一體
論俸開列考選不由堂上官保送以杜交結營謀之弊均下部
議行巡視西城罷鋪墊費查通州倉儲神祠以居廟祝不受值
不入也抑豪強清宿弊毛髮不假借聲日起

聖祖知公可大用超擢通政司參議累遷左右通政光祿寺卿
寺故有招買行戶作姦侵蝕虧經費公治其黠者仍請限年帶
銷所虧

上鑑其誠爲豁免鉅萬尋擢副都御史五十二年擢兵部右侍
郎兼管光祿寺前後凡八年不爲操切而旬積甚晰時方議武
職罷任當回籍公謂年近者可勒歸若久居其所長子孫有墳

墓婚姻宜聽占籍獨持一議上卒如所議行五十八年擢左都御史會兩江總督長蘅以知州王承勳首告安徽布政使年希堯鳳陽知府蔣國正婪取事入奏

上命公往勘還奏國正將虧帑銀三千七百餘兩混入恩免民欠錢糧法當斬希堯失察當奪職明年擢戶部尚書繼武進趙恭毅公後濟以和平六十年主會試得人最甚雍正元年調吏部仍兼管捐納軍需事

世宗御書清謹公方額賜之並賜御製詩有出納望同天北斗清芬品擬省中蘭之句尋主武會試明年主順天鄉試協辦大學士有詔停止戶部及陝西捐例並諭獎公及尚書張

公伯行兩年以來辦理清正。均下部議敘。三年春授文華殿大學士兼吏部尚書。每公退危坐讀書。訐謨謹密。雖子弟莫能知。優旨褒嘉。賜賚無虛月。四年以疾請老。溫諭慰留。六年疾作再請。

上鑒其誠。優詔加太子太師原官致仕。於居第賜宴。令部院堂官齊集。並賜帑金五千兩。爲途費。及高年頤養之資。馳驛起程。日著廷臣祖餞。以寵其行。所過地方有司在二十里以內者。俱著迎送。旋里後令巡撫兩司時至其家存問。將來頤養康健。一二年後再入京陛見。及陛辭。賜御書楹聯。暨冠服朝珠等物。四月行次良鄉。薨。年七十有八。遺疏至。

上震悼遣散秩大臣及侍衛六人往奠茶酒內閣學士侍讀學士各一人往庀喪具。命地方沿途護送伊子年幼家居著巡撫傳諭地方官就近時加照看凡新舊接任均將此旨傳知通行。賜祭葬。予諡文端公。學有本原深經術尊信宋儒躬行實踐事親備色養居喪盡禮不作佛事三年不入內。贈公有木枕泣銘以詩攜持行萬里終身不少離當官廉正以至誠結主知故能恩禮始終哀榮大備若此十二年。諡曰原任大學士田從典品行端直老成廉潔奉國公忠可入祀賢良祠以風有位並於本家。賜祭一壇。子懋由廕生官至吏部侍郎。

黃崑圃侍郎事略 弟叔瓚

公諱叔琳字崑圃本安徽歙縣程氏子也祖伯起與僚壻大興黃中丞善國初黃巡撫甯夏往依焉後黃氏遭家難中丞之弟爾悟無子公父華蕃方九歲爾悟子之遂爲順天大興人公始生具夙慧十歲通四書五經從學饒先生仲如研窮性理之奧又從吳述庵先生究經世學年二十以康熙三十年一甲三名進士授編修益自淬礪與銜檢討既齊討論宋人語錄恂恂然有醅儒風見者不覺其爲少年甲第也遷侍講督學山東毅然以興賢育才爲己任捐修三賢祠於泰山之麓祀宋胡安定孫明復石徂徠俾學者知所景從又興復白雪松林兩書院延

師選才俊。捐飲膏火。所造士多窮經致用之英。翕然稱盛。晉鴻臚少卿。領學政如故。除通政司參議。僉都御史。太常卿。六十一年。遷內閣學士。尋遷刑部右侍郎。雍正元年。典江南鄉試。調吏部侍郎。命偕兩淮鹽政謝賜履赴湖廣。同總督楊公宗仁酌定鹽價。革陋規。商民勒石紀事。三年。授浙江巡撫。翦除巨猾。平冤獄。災傷則賑之。貪墨吏則黜之。仁和錢塘海甯三屬田十數萬頃。全藉省城上下兩塘河水灌溉。自開廢土淤。民占爲田。利甚微。而所損三屬田畝逾巨萬。公疏請照西湖舊址清出。歸湖去其梗塞。開通水源。所屬官塘運河支港壩堰斗門俱一律疏濬。以興水利。部議如所請。浙民便之。爲忌者所誣劾。詔免官。

赴海塘效力。乾隆元年授山東按察使。明年遷布政使。疏言養濟院孤貧口糧。每名歲給米錢三兩六錢。從地丁項下撥給。其春夏秋三季米。係州縣將養廉銀墊給。多不能及時支領。請酌借司庫存公耗羨銀給發。從之。著爲例。四年母憂歸。七年授詹事。坐布政使任內誤揭屬員諱盜。免官。公性嗜學。公餘時手一編。至耄耋不倦。尤負人倫鑑。以薦賢爲重。謂世道之隆替。人才之邪正。消長爲之也。所賞拔如萊州守嚴有禧。長清令劉輝祖。皆以循良遷秩。而分校禮闈主試江南所拔取者。理學則如任宗丞。啟運。政事則如胡恪。靖寶琮。經學則如陳司業祖。范文學。則如徐檢討文靖。張詹事鵬翀。其入祀賢良。則徐撫軍士林。潘

敏惠師桀也。張太史淳夏太史用修李觀察慎修輩皆端方博洽推一時之選。其餘名士宿儒未可殫數。方望溪爲諸生時來謁。一見稱莫逆交。凡望溪所著周禮春秋之學皆與先生往復商訂無少閒。他若周大璋顧進等又數十人不憚千里親炙就正。則所學之及人遠矣。十六年公屆釋褐周甲之歲。當事以聞。詔曰。原任詹事黃叔琳以康熙辛未探花年登太耄重赴瓊林。洵稱熙朝人瑞。可從優加侍郎銜。用示篤耆耆臣至意。二十一年卒。公以文學政事受知。

三朝當代推爲鉅儒。天下士識與不識皆曰。北平黃先生京師首善地。列官朝省者無慮數十百輩。然相與語稱北平不問知。

其爲公也。初新城王文簡公爲海內宗工。公成進士。實出其門。下論者謂前。有新城。後有北平。然新城年七十八。賦詩有得。第重逢辛卯歲之句。冀與新進士序。老少同年。未及期。卽世。而公竟得之。又五年。然後考終。是天之厚公。幾過於新城矣。生平著述。有硯北易鈔。詩經統說。夏小正傳註。史通訓故補註。文心雕龍輯註。顏氏家訓節鈔。硯北雜錄。於經濟學術。各有指歸。計公自五歲入塾。享年八十有五。蓋二萬九千日中。無日不學也。可謂純篤君子矣。弟叔琬。己丑進士。官太僕卿。叔琪。舉人。官甯國知府。皆有賢聲。而叔璣尤著。子登賢。字雲門。官至漕運總督。兵部尙書。

叔璫字玉圖。公行四弟也。其學以立誠爲本。要其功於篤敬。晚號篤齋。以自勸。舉康熙己丑進士。由太常博士遷主事。晉員外郎。以薦擢御史。巡視東城。時王公貴人多以追私逋相屬。且曰。務親治。君正告同列曰。御史非王府官。屬何瑱瑱爲下。所司理之。有銜邸命至公署者。昂然坐滿御史上。君詰以何時奉差視事。噤不能對。則立使撤坐。將劾之。其人悚謝去。自是無敢以私干者。時久罷巡方之制。

聖祖以臺灣亂初定。特遣巡邊。至則翦餘孽。釋脅從。反仄以安。雍正元年任滿。特旨畱一年。命以所行告代者。爲列海疆中要。旣還京。怨家以蜚語中之。坐罷職。乾隆初起河南開歸道。

調督糧道。豫大水。撫卹災民甚周。至濬永城河口。開儀封引河。築虞城堤岸。皆中窾要。在豫四年。母憂歸。服除。補江南常鎮道。又三年致仕。家居七年卒。年七十有七。平居喑喑然。言不出口。遇大事。侃然執持不少撓。屈究心。宋五子書及元明諸儒集。晚歲所養益粹。嘗語人曰。道學卽正學也。親正人。聞正言行正事。斯爲實學。不然空談性命。胡爲哉。著有近思錄集注。慎終約編。既倦錄。廣字義諸書藏於家。